

四庫全書

史部

欽定四庫全書

史部

欽定續通志卷一百八十一至一百八十四

通鑑副使臣施朝翰覆勘

總校官原任侍講臣王燕緒

欽定續通志卷一百八十一

欽定續通志卷一百八十一

宗室傳

臣等謹按歷代史傳別立宗室一門所以重天潢也鄭樵作通志自漢迄隋衰而輯之其間有史分而志合者若漢之淮南厲王長晉之愍懷太子遹是也有史離而志續者若班史齊悼惠王肥諸子是也有史闕而志補者若吳志孫桓傳弟俊諸孫

丞是也有史繫之列傳而志入宗室者若魏志之
曹仁曹洪梁書之蕭景是也自隋而下史例互有
異同唐書備載諸王而新書遺殤帝重茂五代史
統之家人傳宋史於皇族諸子別為一編遼史表
詳而傳畧金史表畧而傳詳元史則有表而無傳
後有作者奚以折衷而歸於一是哉今仿鄭例彙
輯成編分者合之離者續之間亦採諸列傳參之
皇子皇族表以補其所未備如宋濮安懿王金景

睿顯三宗元睿裕顯順四宗則依鄭志中漢宣帝
父史皇孫桓帝父蠡吾侯例依次而類叙之庶幾
以傳紀事之中仍不失以表系世之意至其列目
之次較之鄭志稍從畧焉蓋參用新唐書之例也

唐一

太祖諸子

畢王璋

道宗
涵

孝基

雍王繪

道玄
漢

郇王禧

叔良
德良

孝協
幼良

蔡王蔚

環
璵

孝恭
璵

晦

鄭王亮

神通

道彥

孝逸

國貞

嵩

齊物

復

神符

從晦

世祖諸子

蜀王湛

博义

載

太祖八子長延伯次真次世祖皇帝次璋次繪次禕次

蔚

按世系表作蔡王
罔序謹王真下

次亮

南陽公延伯

按世系表云仕北
齊為散騎常侍

彞薨無嗣高祖武德中

與六王同追封

譙王真從太祖戰歿無嗣

按世系表譙王子竟陵王道
素以驍王第五男詔子繼

畢王璋仕周為梁州刺史與趙王佑謀殺隋文帝不克

死生二子曰韶曰孝基

按吳維糾謬云畢王璋傳載生二子曰韶曰孝基世系表畢王

房止有孝基及失名者二人無東平主韶韶是雍王繪子世次甚明與傳不同今考舊書孝基傳云無子以從兄韶子為嗣與新書世系表合是本傳誤也韶死隋世武德時追封東平郡

王生子道宗

江夏郡王

按舊唐書及世系表皆作江夏王

道宗字承範高祖即位授

左千牛備身畧陽郡公裴寂與劉武周戰度索原寂敗賊逼河東道宗年十七從秦王討賊王登玉壁城以望

謂道宗曰賊怙衆欲戰爾計謂何對曰武周席勝剋然
鋒未可當正宜以計摧之且烏合之衆憚持久若堅壁
以頓其銳須食盡氣老可不戰禽也王曰而意與我合
既而賊糧匱夜引去追戰滅之出為靈州總管時梁師
都弟洛仁連突厥兵數萬傳于壘道宗閉城守伺隙出
戰破之高祖謂裴寂曰昔魏任城王彰有卻敵功道宗
似之因封任城王

資治通鑑作
任城郡王

始突厥郁射設入居五

原道宗逐出之震耀威武斥地贏千里貞觀元年召拜

鴻臚卿遷大理太宗方經畧突厥復授靈州都督三年

為大同道行軍總管助李靖破虜親執頡利可汗賜封

六百戶

按英續糾謬云李靖突厥傳禽頡利者張寶相也而道宗傳以為道宗親執未知孰是今考舊

唐書傳載遇李靖破頡利可汗頡汗以十餘騎來奔其部道宗引兵逼之徵其執送頡利頡利以數騎夜走匿

于荒谷沙鉢羅懼馳追獲之遣使送于京師又考資治通鑑載頡利將奔吐谷渾大同道行軍總管任城王道

宗引兵逼之使蘇尼失執送頡利蘇尼失懼馳追獲之庚辰行軍副總管張寶相帥衆奄至沙鉢羅營俘頡利

送京師是道宗引兵逼其執送而傳誤以為親執耳還為刑部尚書吐谷渾寇邊

靖出崑邱道詔與侯君集為靖副賊聞兵且至走嶂山

數千里諸將欲止獨道宗請窮追靖曰善君集未從道宗以單師進去大軍十日及之吐谷渾拒險殊死鬪道

宗陰引十騎超山乘其後賊驚遂大潰徙封江夏

舊唐書作

十二年遷禮部尚書改封江夏王

授鄂州刺史久之坐貪贓帝聞怒曰

人心無藝當以誼制之今道宗已王廩賜多而貪不止顧不鄙哉乃免官削封戶以王就第明年詔為茂州都督未行拜晉州刺史遷禮部尚書侯君集破高昌還頗怨望道宗嘗從容奏言君集智小言大且為戎首帝問

所以知必反者對曰見其忌而矜功耻為房李下官尚
書常鬱鬱不平帝曰君集誠有功材無不堪朕寧惜爵
位耶第未及耳不宜輕億度使自猜危既君集反帝笑
曰如公素揣帝將討高麗先遣營州都督張儉輕騎度
遼窺形勢儉畏不敢深入道宗請以百騎往帝許之約
其還曰臣請二十日行留十日覽觀山川得還見天子
因秣馬東兵旁南山入賊地相易險度營陣便處將還
會高麗兵斷其路更走間道謁帝如期帝曰賁育之勇

何以過乃詔與李勣為前鋒濟遼拔蓋牟城會賊救至
道宗與總管張君乂領騎裁四千虜十倍皆欲浚溝保
險須帝至道宗曰賊遽來其兵必疲我一鼓摧之必矣
昔耿弇不以賊遺君父吾為前軍當清道迎乘輿尚何
待勸善之選壯騎數十突進賊營左右出入勸合擊大
破之帝至咨美乃築拒闔攻安市城闔毀傅城道宗失
部分反為賊據帝斬其果毅傅伏愛道宗跣行請罪帝
曰漢武帝殺王恢不如秦穆公赦孟明遂置不問在陣

傷足帝親加砭治賜御膳還以疾辭劇就閑改太常卿
高宗永徽初房遺愛以反誅長孫无忌褚遂良與道宗
有宿怨誣與遺愛善流象州道病薨年五十四无忌等
得罪詔復爵邑道宗晚好學接士大夫不倦于貴國初
宗室唯道宗孝恭為最賢子景恒封盧國公相州刺史
道宗弟道興武德初爵廣寧郡王以屬疏降封縣公貞
觀九年為交州都督以南方瘴癘恐不得年頗忍忍憂
悵卒于官贈交州都督

永安壯王孝基武德初得王厯陝州總管鴻臚卿以罪
奪官二年劉武周寇太原夏人呂崇茂以縣應賊詔孝
基為行軍總管攻之工部尚書獨孤懷恩內史侍郎唐
儉陝州總管于筠隸焉筠請急攻城絕外援且當有變
時懷恩挾異計紹說孝基曰夏城堅攻之引日宋金剛
在近內拒外彊一敗塗地不如頓兵待秦王破賊則夏
自孤此謂不戰而屈人也孝基謂然會尉遲敬德至與
崇茂夾彥官師遂大敗孝基及筠等皆執于賊謀亡

邱為賊所害高祖為發哀優賜其家晉陽平購尸不獲

招魂以葬贈左衛大將軍反諡無子以兄子

舊書作從兄詔子

道立嗣封高平王後降封縣公終陳州刺史曾孫涵

涵簡素忠謹為宗室雋累授贊善大夫郭子儀表為關

內鹽池判官肅宗至平涼未知所從朔方留後杜鴻漸

等條士馬倉廩使涵奉牋馳謁肅宗涵既見敷奏明辨

肅宗悅除左司員外郎再遷宗正少卿寶應初河朔平

涵方母喪奪哀持節宣慰所至州縣非公事未嘗言䟽

飯水飲席地以暝使還固請終制代宗見其瘠毀許之
服除擢給事中遷兵部侍郎朱希彩殺李懷仙復宣慰
河北還為浙西觀察使居五歲入朝拜御史大夫京畿
觀察使德宗嗣位以涵和易無所繩舉除太子少傅山
陵副使以父諱徙光祿卿未幾遷左散騎常侍以尚書
右僕射致仕累封襄武縣公卒贈太子太保子鰓貞元
初為饒州別駕妻高以善歌入宮鰓因御賢許詠通書
坐誅

雍王繪為隋夏州總管子，勢迫爵河南王，生道玄。

淮陽壯王道玄，性謹厚，習技擊，然進止都雅武德初例。
王年十五，從秦王擊宋，金剛于介州，先登。王壯之，賞予
良厚，討王世充，戰多實，建德屯虎牢，王輕騎致賊，遣道
玄伏以待賊，至走之，轉戰汜水，登南坂，貫賊陣，出其背。
復引還，賊皆靡，所發命中。王喜，以副騎給之，每赴敵，飛
矢着身如蝟，氣益厲。東都平，為洛州總管府，廢更授刺
史，俄為山東道行軍總管，討劉黑闥，以多見褒黑闥再

亂道玄率史萬寶戰下博越渾馳約萬寶繼進萬寶素少之不肯前曰吾被詔以王兒子名大將而軍進退實在我今其輕鬪若大軍竭馳必陷渾莫如以王昭賊我結陣待之雖不利王而利國也道玄遂戰歿年十九萬寶為賊所乘舉軍潰身獨免太宗追悼曰自兵興兒常從我每見我深入必克故慕之惜其少遠圖不究哀哉因流涕贈左驍衛大將軍及謚無子以弟道明嗣王遷左驍衛大將軍貞觀十四年與武衛將軍慕容寶節送

弘化公主於吐谷渾坐漏言主非帝女奪王終鄆州刺史六世孫漢

漢字南紀少事韓愈通古學屬辭雄蔚為人剛畧類愈愈愛重以子妻之擢進士第累遷左拾遺敬宗侈宮室舶賈獻沉香亭材帝受之漢諫曰以沉香為亭何異瑤臺瓊室乎是時王政謬僻漢言切多所救補坐婬訐出佐興元幕府文宗立召為屯田員外郎史館修撰論次憲宗實錄書宰相李吉甫事不假借子德裕惡之會李

宗閔當國擢知制誥稍進御史中丞吏部侍郎初德裕
貶袁州漢助為排擠後德裕復輔政漢坐宗閔黨出為
汾州刺史宗閔再逐改州司馬詔有司不二十年不得
用還不數歲徙絳州長史遂不復振大中時召拜宗正
少卿卒始漢為中丞表孔溫業為御史及漢晚見召溫
業已為中丞每燕集人以為榮

郇王禧為隋上儀同三司生子叔良德良幼良

按世系表郇王

禧子尚有武陵郡王伯良中
山郡王仲良季良傳皆不載

長平肅王叔良武德初例王鎮涇州捍薛仁果仁果內

史令翟長孫以衆降

吳鎮糾謬曰薛仁果傳作內史令翟長孫

於是大饑米

斗千錢叔良不恤士損糧以漁利下皆怨仁果知之陽

言食盡去遣高墪人詭降叔良遣剽騎劉感受之未至

城三烽發仁果兵自南原譟而還大戰百里細川感為

賊執叔良懼悉出金勞軍委事於長孫乃克安久之突

厥入寇詔叔良率五將軍擊之中流矢道薨贈左翊衛

大將軍靈州總管子孝協嗣

孝協始王范陽俄降為郇國公魏州刺史麟德中坐賊
抵死司宗卿隴西王博義等為言於高宗求貸帝不許
遂自殺弟孝斌為原州都督府長史生子思訓為江都
令武后多殺宗室思訓棄官去中宗復位以耆舊擢宗
正卿封隴西郡公歷益州都督府長史開元初進彭國
公加戶滿四百進右武衛大將軍卒贈秦州都督陪葬
橋陵思訓善畫世所謂李將軍山水者弟思誨為揚州
參軍事子林甫自有傳

新興郡王德良少以疾不任職薨贈涼州都督孫晉先
天中為雍州長史治有名襲王坐豫太平公主謀被誅
改氏厲晉就刑僚吏犇解唯司功參軍李撝從王如它
日晉死哭其尸盡哀姚元崇歎曰藥向儔耶擢為尚書
郎

長樂郡王幼良資暴急高祖數曉勸不悛有盜其馬者
輒殺之帝怒曰盜信有罪王而專殺可乎詔禮部尚書
李綱召宗室即朝堂杖之乃釋去為涼州都督嘯不逞

為左右市里苦之太宗立或告王陰養士交境外詔中書令宇文士及往代并按狀士及繩之急左右恐欲劫王由間道趨長安自明不即北奔突厥士及露劾帝復遣侍御史孫伏伽鞠視無異辭遂賜死六世孫回別有傳

蔡烈王蔚為周朔州總管生子安哲

西平懷王安仕隋為右領軍大將軍封趙公武德時例

王生子琛孝恭瑛瓌

按世系表西平王安子長平原王瑒次霍山王璉傳皆不載

襄武郡王琛字仲寶本訥少文隋義寧初封襄武郡公
與太常卿鄭元璿持女伎聘突厥始畢可汗約和親始
畢禮之贈遺蕃渥遣骨吐祿特勒隨琛入獻授刑部侍
郎武德初始王厯利蒲絳三州總管
舊唐書作厯蒲絳二州總管宋
金剛陷滄州稽胡多叛詔琛鎮隰州政寬簡為夷夏愛
後農子儉襲王例降為公

河間元王孝恭少沈敏有識量高祖已定京師詔拜山
南招慰大使徇巴蜀下三十餘州進擊朱粲破之俘其

衆諸將曰梁徒食人驚賊也請阮之孝恭曰不然今列城皆吾寇若獲之則殺後渠有降者乎悉縱之繇是騰檄所至輒下明年拜信州總管承制得拜假當是時蕭銑據江陵孝恭數進策圖銑帝嘉納進王趙郡以信州為夔州乃大治舟艦肄水戰會李靖使江南孝恭倚其謀遂圖江陵盡召巴蜀首領子弟收用之外示引擢而內實質也俄進荆湘道總管統水陸十二軍發夷陵破銑二鎮縱戰艦放江中諸將曰得舟當濟吾用棄之反

資賊奈何孝恭曰銑之境南際嶺左薄洞庭地險士衆
若城未拔而援至我且有內外憂舟雖多何所用之今
銑瀕江鎮戍見艦舫蔽江下必謂銑已敗不即進兵覘
候往返以引救期則吾既拔江陵矣已而救兵到巴陵
見船疑不進銑內外阻絕遂降帝悅遷荊州大總管詔
圖破銑狀以進孝恭治荊為置屯田立銅冶百姓利之
遷襄州道行臺左僕射時嶺表未平乃分遣使者綏輯
安慰其款附者四十有九州朝廷號令暢南海矣未幾

輔公祐反寇壽陽詔孝恭為行軍元帥討之引兵趨九

江李靖李勣黃君漢張鎮州

資治通鑑
作張鎮周

盧祖尚皆稟節

度將發大饗士栢水變為血坐皆失色孝恭自如徐曰

禍福無基唯所召爾顧我不負于物無重諸君憂公祐

禍惡貫盈今仗威靈以問罪栢中血乃賊臣授首之祥

乎盡飲罷衆心為安公祐將馮惠亮等拒險邀戰孝恭

堅壁不出遣奇兵絕饒道賊饑夜薄營孝恭臥不動明

日使羸兵扣賊壘挑之祖尚選精騎陣以待俄而兵卻

賊追北且囂遇祖尚軍薄戰遂大敗惠亮退保梁山孝
恭乘勝破其別鎮賊赴水死者數千計公祐窮棄丹陽
東走追禽之江南平璽書褒美賜甲第一區進授東南
道行臺左僕射行臺廢更為揚州大都督孝恭再破巨
賊北自淮東包江度嶺而南盡統之欲以威重誇遠俗
乃築第石頭城陳廬徵自衛或誣其反召還頗為憲司
錮詰既無狀赦為宗正卿賜實封千二百戶歷涼州都
督晉州刺史貞觀初為禮部尚書改王河間性奢豪後

房歌舞伎百餘然寬恕退讓無矜伐色太宗用是親重之宗室莫比也嘗謂人曰吾所居頗壯麗非吾心也當別營一區令粗足充事而已吾歿後子也才易以守不才不為它人所利十四年中飲暴薨帝哭之慟贈司空揚州都督及謚陪葬獻陵始隋亡盜賊徧天下皆太宗身自討定謀臣騎帥並隸麾下無特將專勲者惟孝恭獨有方面功以自見云子崇義晦崇義嗣王降封譙國公歷蒲同二州刺史益州都督府長史有威名終宗正

卿

晦乾封中為營州都督以治狀聞璽書勞賜遷右金吾將軍檢校雍州長史摧擿姦伏無留隱吏下畏之高宗將幸洛詔晦居守謂曰關中事一以屬公然法令牽制不可以成政法令外苟可以利人者行之毋須以聞故晦治有異績武后時遷秋官尚書卒贈幽州都督初晦第起觀閣下臨肆區其人候晦曰庶人不及以禮然室家之私不願外窺今將辭公晦驚遽毀徹之子榮奉吳

王恪祀

濟北郡王瑛武德中為尚書左丞例王終始州刺史

漢陽郡王瓌始為郡公進王高祖使持幣遺突厥頡利
可汗言和親事頡利始見瓌倨甚瓌開說示以厚幣乃
大喜改容加禮因遣使隨入獻名馬後復聘頡利謂其
下曰前瓌來悔不少屈之當使拜我瓌伺知之既見頡
利即長揖頡利怒留不遣瓌意象自若不為屈虜知不
可劫卒以禮遣遷左武候將軍代孝恭為荊州都督政

務清靜嶺外酋豪數相攻瓌遣使諭威德皆如約不敢
亂後例為公長史馮長命者嘗為御史大夫素貴事多
專決瓌怒杖之坐免起為宜州刺史散騎常侍薨

濟南郡王哲為隋柱國備身將軍追王子瑗

廬江郡王瑗字德圭武德時例王累遷山南東道行臺
右僕射與河間王孝恭合討蕭銑無功更為幽州都督
瑗素懦朝廷恐不任職乃以右領軍將軍王君廓輔行
君廓故盜也其勇絕人瑗倚之許結婚寄心腹時隱太

子有陰謀厚結瑗太子死太宗令通事舍人崔敦禮召瑗瑗懼有變君廓內險賊欲以計陷瑗而取已功即謂瑗曰事變未可知大王國懿親受命守邊擁兵十萬而從一使者召乎且趙郡王前已屬吏今太子齊王又復爾大王勢能自保邪因泣瑗信之曰以命累公乃因敦禮勒兵召北燕州刺史王鉞與計事兵曹叅軍王利涉說瑗曰王今無詔擅發兵則反矣當須權結衆心若諸刺史召之不至將何以全瑗曰奈何對曰山東豪傑嘗

為竇建德所用今失職與編戶夷此其思亂若旱之望
雨王能發使使悉復舊職隨在所募兵有不從得輒誅
之則河北之地可呼吸而有然後遣王銑外連突厥絲
太原南趨蒲絳大王整駕西入關兩軍合勢不旬月天
下定矣瑗從之以內外兵悉付君廓利涉以君廓多翻
覆請以兵屬詵瑗猶豫君廓密知之馳斬詵首詢于軍
曰李瑗與王詵反錮敕使擅追兵今詵已斬獨瑗在無
能為也諸軍從之且族滅助我者富貴可得衆曰願討

金史卷一百一十一
賊乃出敦禮于獄瑗聞之率左右數百被甲出君廓呼
曰瑗誅亂諸君皆誑誤若何從之以取夷戮衆反走瑗
罵君廓曰小人賣我行自及即禽瑗縊之傳首京師廢
為庶人絕屬籍

鄭孝王亮仕隋為海州刺史追王生子神通神符

淮安靖王神通少輕俠隋大業末在長安會高祖兵興
吏逮捕亡命入鄂南山與豪英史萬寶裴勣柳崇禮等
舉兵應太原約司竹賊師何潘仁連和進與平陽公主

兵合徇鄆下之自署關中道行軍總管以萬寶為副勳
為長史崇禮為司馬令狐德棻為記室從平京師為宗
正卿典兵宿衛王永康郡俄徙淮安武德初拜山東安

撫大使黃門侍郎崔幹副之

資治通鑑
作崔世幹

進擊宇文化及

于魏化及敗走聊城神通追北賊糧盡願降神通不肯
受幹請約之神通曰師久暴露今賊食盡克不旦暮正
當破之以玉帛酬戰力若降吾何所藉手幹曰竇建德
已至而化及未平我轉側兩賊間勢必危王又貪其玉

帛敗無日矣神通怒囚幹軍中會士及自濟北餽軍化
及復振神通進兵薄其壘貝州刺史趙君德先登板堞
神通忌其功止軍不進君德怒詬而還城復堅神通遣
兵走魏州取攻具為莘人所乘引却後二日建德拔聊
城勢遂張山東州縣靡然歸之神通麾下多亡乃退保
黎陽依李世勣俄為建德所虜後與同安公主自賊歸
及建德滅復授河北行臺左僕射從平劉黑闥遷左武
衛大將軍薨贈司空神通十一子得王者七人道彥孝

譽孝同孝慈孝友孝節孝義後皆降王孝逸爵公孝銳

不得封有子齊物

舊書作孝銳曾孫齊物改世系表齊物乃孝銳之孫也此處子字恐誤

顯

膠東郡王道彥幼孝謹初神通避吏于鄆被疾山谷間

累旬食盡道彥羸服丐人間或採野實以進神通未食

不敢先即有所分辭以飽乃藏去以待高祖初封義興

郡公例得王貞觀初為相州都督徙岷州以父喪解荷

土就墳躬時松柏偃廬柴毀雖親交不復識太宗嗟嘆

敕侍中王珪臨諭服除復拜岷州都督間遣入党項諭
國威靈區落降從李靖擊吐谷渾詔道彥為赤水道總
管帝厚以利啖党項使為鄉導其酋拓拔赤辭詣靖自
言隋擊吐谷渾我資其軍而隋無信反見仇剽今將軍
若無它我願資糧將復如隋乎諸將與軟血遣之道彥
至濶水見無備因掠其牛羊諸羌怨即引兵障野狐峽
道彥不得進為赤辭所乘軍大敗死者數萬退保松州
詔減死謫戍遷久之名為媯州都督卒贈禮部尚書初

武德五年同封者孝譽為高密王孝同淄川王孝慈唐
平王孝友河間王孝節清河王孝義膠西王於是唐始
興務廣走蕃鎮天下故從昆弟子自勝衣以上皆爵郡
王太宗即位舉屬籍問大臣曰盡王宗子於天下可乎
封德彝曰漢所封惟帝子若親昆弟其屬遠者非有大
功如周郇滕漢賈澤並不得濫封

原文云其屬遠非大功不王如周郇滕漢

賈澤尚不得茅土據吳鎮糾誤曰周之郇滕漢之賈澤皆封國有土安得謂之尚不得茅土乎此蓋因舊書之文而誤也今改從舊書

所以別親疎也先朝一切封之爵命崇而

力役多以天下為私奉非所以示至公帝曰朕君天下以安百姓不容勞百姓以養已之親於是疎屬王者皆降為公唯嘗有功者不降故道彥等並降封公

孝逸少好學頗屬文始封梁郡公高宗時四遷益州大都督府長史武后擅國入為左衛將軍親遇之徐敬業稱兵以孝逸為左玉鈐衛大將軍楊州行軍大總管帥師南討至淮而敬業已攻潤州遣弟敬猷壁淮陰偽將韋超據都梁山以拒孝逸超衆憑險完屯孝逸會諸將

議曰賊今負山攻則士無所用力騎不得騁寇救死傷
夷必衆不如偏旅綴之全軍趨揚州勢不數日可破度
支使薛克構曰超雖據險然兵少若置小敵不擊無以
示威拔衆以守則戰有闕捨之則後憂不如擊之若克
超淮陰自震淮陰破楚諸縣開門候官軍矣由是以趨
江都逆首可取孝逸從之登山爭擊超歘數百人薄暝
解超夜走進擊敬猷淮陰破之敬業回軍下阿溪孝逸
引兵直度敬業大破遂拔揚州以功進鎮軍大將軍徙

封吳國公威名稜然武承嗣等忌之以讒下遷施州刺史又使人騰惡語聞上武后信之以嘗有功貸死流儋州薨

按武后紀天授元年殺梁即公孝逸與傳互異

景雲初贈金州

舊書作益州

大

都督孝同曾孫國貞

國貞父廣業為劍州長史國貞剛鯁有吏才乾元中由長安令遷河南尹史思明寇東都李光弼壁河陽國貞率官吏西走陝數月召為京兆尹上元初拜劍南節度使召為殿中監以戶部尚書持節朔方鎮西北庭興平

陳鄭節度行營兵馬及河中節度都統處置使治于絳
尋加晉絳慈隰沁等州觀察處置使既至糧乏而所儲
陳腐民貧不忍遽歛上書以聞而軍中譁謗突將王振
乘衆怨紿曰具畚鍤以待役事衆皆怒夜燒牙門左右
奔告請避之國貞曰吾被命為將其可棄城乎固請乃
逃獄中振引衆劫取之置食于前曰食是而役其力可
乎國貞曰與爾等方討賊何事役為正緣儲食腐儉已
請諸朝吾何所負衆服其言且引去振曰都統不死吾

曹昭矣遂害之並殺其二子及三大將有詔以郭子儀代之國貞清白善用法世稱辦吏然峻于操下故其衆思得子儀而振因肆其惡及子儀至振自謂且見德子儀怒曰汝臨賊境而害主將賊若乘虛是無絳矣又欲為功乎即斬以徇詔贈國貞揚州大都督子錡自有傳孝節曾孫曷按世系表曷係孝節之孫傳恐誤少孤事母孝始為枝江丞荊州長史張柬之曰帝宗千里駒吾得其人累擢衛尉少卿居母喪柴瘠訖除家人未嘗見言笑與兄昇弟

暈相友開元初為汝州刺史政嚴簡有治稱昆弟繇東
都侯之輒羸服往州人無知者其清慎舉如此四遷至
黃門侍郎檢校太原以北諸軍節度使太原俗為浮屠
法者死不葬以尸棄郊伺鳥獸號其地曰黃阮有狗數
百頭習食齕頗為人患吏不敢禁罵至遣捕羣狗殺之
申厲禁條約不再犯遂革其風二十一年以工部尚書
持節使吐蕃既還金城公生請明彊場表石赤嶺上盟
遂堅定還以奉使稱旨再遷吏部尚書美風儀以莊重稱

當時有宰相望累為太子少傅武都縣伯卒贈益州大都督暈至太僕少卿暈子進亦知名好從當世賢士游
賙人之急累擢給事中至德初從廣平王東征以工部侍郎署雍王元帥府行軍司馬為回紇鞭之幾死遷兵部卒贈禮部尚書

孝節四世孫說字巖甫父遇及天寶時為御史中丞東畿採訪使說以蔭補率府兵曹參軍馬燧節度太原辟署少尹遷汾州刺史李自良代燧復奏為少尹大將張

瑤得士心嘗請告未許而自良卒說與監軍王定遠秘其喪前給瑤告以毛朝陽代之然後告喪詔以通王為節度大使授說行軍司馬節度留後定遠自以有勞于說頗橫恣請別賜印監軍有印自定遠始於是擢補吏易置諸將彭令茵者以久勞不服定遠怒殺之埋馬屎中其家請尸不許舉軍怨說上其事德宗以奉天扈從功恕死免官詔未至定遠謀刺說走而免定遠召諸將出笥中詔書給曰詔以李景畧知留後召說還公等皆

有除諸將欲拜大將馬良輔呼曰妄言也不可授定遠
懼走乾陽樓召麾下皆不至自投下死說盡斬同謀者
乃安擢說檢校禮部尚書節度使累封隴西縣男說精
于職築天成軍邊備積完晚被疾不能事軍幾亂卒贈
尚書右僕射

齊物字道用天寶初累擢陝州刺史開砥柱通漕路發
重石下得古鐵戟若鏃然銘曰平陸上之詔因以名縣
遷河南尹坐與李適之善貶竟陵太守還遷京兆尹太

子太傅兼宗正卿卒贈太子太師性苛察少恩喜發人私然潔廉自喜吏無敢欺者愆陝尉斐冕械而折愧之及冕當國除齊物太子賓客世善冕能捐怨云子復復字初陽以蔭仕累為江陵司錄參軍衛伯玉才之表江陵令遷少尹歷饒蘇二州刺史李希烈叛荆南節度使張伯儀數為賊窘朝廷以復在江陵得士心即母喪奪為少尹充行軍司馬佐伯儀會伯儀罷改容州刺史兼本管招討使先是西原亂吏獲反者沒為奴婢長役

之復至使訪親戚一皆原縱在容三年人賴以安轉嶺南節度使時安南經畧使高正平張應繼卒其佐李元度胡懷義等因阻兵脅州縣肆為姦賊復至誘懷義杖死流元度南裔肅然教民作陶瓦鑄諭蠻獠收瓊州置都督府以綏定其人召拜宗正卿歷華州刺史貞元十年鄭滑節度使李融卒軍亂以復檢校兵部尚書代融節度復下令懲營田以稟其軍而賦不及民衆悅加檢校尚書右僕射卒年五十九贈司空謚曰昭復更方鎮

所在稱治然頗嗜財為世所譏從父若水為左金吾大將軍兼通事舍人容貌瓌偉在朝三十年多識舊儀每宣勞揖贊進止閑華有可觀者

襄邑恭王神符字神符少孤事兄謹高祖興兵神符留長安為衛文昇所囚京師平封安吉郡公帝受禪例王遷并州總管頡利可汗盜邊神符與戰汾東斬級五百獲馬二千又戰沙河獲乙利達官得可汗所乘馬及鎧名為太府卿遷揚州大都督自丹陽度江治隋江都故

郡揚人利之然少威嚴不為下所畏累擢宗正卿以足
不良改光祿大夫歸第月給羊酒太宗就第慰問又令
乘小輿入紫微殿遷開府儀同三司永徽二年薨贈司
空荊州都督陪葬獻陵子七人並爵郡王例降公唯德
懋文疎知名德懋官少府監臨川郡公五世孫從晦文
疎幽州都督魏國公垂拱中坐累貶藤州別駕誅子挺
捷捷襲封挺曾孫程捷曾孫石別有傳

從晦祖模仕至德中為猗氏令史思明陷洛陽賊帥掠

諸縣模率衆拒平之稍遷點中觀察使終太子賓客贈
太子太保謚曰敬從晦寶歷初及進士第累擢太常博
士甘露之禍御史中丞李孝本被誅從晦以族昆弟貶
朗州司戶參軍改澧王府諮議分司東都忌者重發前
坐下遷亳州司馬久乃轉吏部郎中兼侍御史知雜事
出為常州刺史鎮海軍節度使李琢表其政賜金紫歷
京兆尹工部侍郎山南西道節度使又以最就進銀青
光祿大夫卒年六十三贈吏部尚書從晦姿質偉岸所

至以風力聞少與崔龜從李景讓裴休善獎目後進名
知人楊牧方布衣進謁從晦一見如雅識即待以公輔
後果宰相

世祖

按世系表及舊唐書俱稱代祖高祖紀及資治通鑑並載武德元年追謚皇考曰元皇帝廟號世祖與

傳相符

今從傳

四子長曰澄次湛次洪次高祖神堯皇帝

按世系表

長高祖次澄次湛次

洪序次與傳互累

梁王澄蚤薨無嗣武德初與二王同追封

蜀王湛生子博又奉慈

隴西恭王博義武德初與奉慈例王高宗時擢累禮部尚書特進驕侈不循法度妓妾數百曳羅紈甘粱肉放於聲樂以自娛其弟奉慈亦荒縱皆為帝所鄙嘗曰吾仇人有善且用之況親戚乎王等昵小人專為不軌先王墳典不聞學何以為善哉各賜市書絹二百疋以愧切之然不自克也薨贈開府儀同三司荊州都督渤海敬王奉慈顯慶時為原州都督薨七世孫戡戡字定臣幼孤年十歲餘即好學大寒掘薪自炙夜無

然膏默念所記年三十明六經舉進士就禮部試吏唱
名乃入戡恥之明日逕返江東隱陽羨里陽羨民有鬪
爭不決不之官而詣戡以辨凡論著數百篇常惡元和
有元白詩多纖艷不逞而世競重之乃集詩人之類夫
古者斷為唐詩以譏正其失云平廬節度使王彥威表
為巡官府遷還洛陽卒

欽定續通志卷一百八十一